




Tinan ida ne'e, iha programa formasaun nian ba animadór sira, ba tempu ida-idak sei propoin Lectio Divina ida, atu, liuhusi Maromak nia Futar Lia, animadór sira bele hakle'an liután sira-nia fiar. Tanba oratorianu sira mós sei hakle'an pasajen sira ne'e, nune'e di'ak liu ba tempu ida-idak, animadór sira hahú sira-nia formasaun liuhusi Lectio.

Ita hahú ita-nia reflesaun hodi husu Espíritu Santu nia tulun atu buat hotu ne'ebé ita lee no komprende bele mai husi Maromak no leno ita-nia moris loron-loron nian



INTRODUSAUN

Akontesimentu Jeriku nian, halo parte kapitulu 10 evanjellu Markos nian, iha ne'ebé evanjelista ko'alia kona-ba tuir Jezús; tan ne'e, Bartimeu nia istória sai simbolu kona-ba dalan fiar nian, husi bainhira hahú hanoin atu fiar, to'o tuir Jezús. Pasajen ida ne'e taka parte daruak evanjellu Markos nian no Jezús sei la halo milagre tan atu fó isin di'ak ba ema: husi momentu ida ne'e Nia hahú la'o ba hasoru Ninia terus no mate. Hodi kompara buat ne'ebé Markos hakerek ho evanjellu Mateus no Lukas nian, bele haree katak Markos nia istória iha partikulár barak liu, no halo biblista hanoin katak sasin ida (karik Pedro?) haktuir ba Markos buat ne'ebé akontese.

Jeriku, sidade iha ne'ebé Jezús hasoru Bartimeu, mak sidade furak iha rai fuik maran; maski besik Tasi Mate, tanba iha beematan barak, iha sidade bele hetan ai-hun boot, aifuan no aifunan; iha ne'e Jezús hasoru ona Zakeus no nakfilak ninia moris. Maski ambiente jetu hanesan ne'e, Jezús sei hetan ema iha situasaun susar no terus nian.

Lee hakmatek evanjellu: Mk 10,46-52

LECTIO

Lee fali ho atensaun no evidénsia **personajen** ida-idak ne'ebé mosu iha pasajen ida ne'e:

JEZÚS: nia la'o ho ema barak ne'ebé akompaña Nia, maibé nia atu hahú dalan ba Jerusalelem, iha ne'ebé ema sei la husik Nia mesak. Baibain bainhira Jezús la kahi katak ema bolu Nia Maromak nia Oan ka David nia Oan (títulu Messias nian), maibé iha momentu ida ne'e, ne'ebé besik ona atu hatudu nia glória, nia husik matan delek ne'e hakilar: la iha ona motivu atu rai "segredu" kona-ba ninia An rasik.

ESKOLANTE sira: la'o hamutuk ho Jezús nafatin, maibé dala barak sira hatudu katak la komprende Jezús nia mensajen ka ninia eziénsia sira.


EMA LUBUN BOOT: ema hotu hakarak hasoru no book Jezús, maibé mós seidaok komprende Jezús nia mistériu, tan ne'e, bainhira Bartimeu hakilar, sira si'ak nia tanba sira hanoin katak Jezús la iha tempu ba nia. Maibé ikus nian, sira tenke tuir Jezús nia liafuan sira no ba bolu matan delek ne'ebé sira hakribit!

BARTIMEU: evanjellu la dehan oinsá nia sai matan delek, maibé haree katak ema la konsidera nia, kuaze hanehan nia. Maibé, maski ki'ak rabat rai, Bartimeu seidaok lakon ninia esperansa, tan ne'e prontu atu hakilar bainhira Jezús liu.

Hahalok sira (verbu) bele hatudu ema nia sentimentu

HAKILAR: karik Bartimeu rona ema lubun boot haklalak, halo konfusaun, tan ne'e nia komprende katak Jezús sei liu daudaun no nia hakilar. Bainbain Markos uza verbu ida ne'e bainhira ema ida ta'uk liu, ka bainhira demoniu sira hasoru Jezús, maibé, ba dala uluk, verbu ida ne'e espresa ema nia konfiansa: Bartimeu hakilar hodi fiar katak Maromak rona kiak sira nia hakilar (kf. Salmu 34). Tan ne'e, maski ema koko atu taka nia ibun, nia kontinua hakilar, no hakilar forte liután.

BOLU: iha versikulu 49, verbu ida ne'e mosu dala 3. Kapitulu tomak ko'alia kona-ba tuir Jezús, maibé iha fraze ida ne'e, liafuan *bolu* ne'ebé Jezús, ema lubun boot no evanjelista rasik uza, hatudu katak moris tomak mak bolun ida no ema sira moris hodi hatán ba bolun ida ne'e.



SOE... HAKSOIT (HAMRIIK)... BA...: verbu tolu ne'e ne'ebé tutuir malu, espresa, ho maneira maka'as, movimentu ne'ebé ema prezisa halo atu ba hasoru Jezús: husik buat hotu (kf. Mk 10,21) no tuir Jezús. Verbu tolu ne'e mós hatudu katak ema "prontu" atu halo buat ne'ebé Maromak hakarak.

Ó hakarak Ha'u atu halo sa ida ba ó?: Jezús foin halo pergunta ida ne'e ba eskolante sira ne'ebé hakesuk malu (kf. Mk 10,36), maibé bainhira eskolante sira husu atu tur iha Jezús nia sorin karuk eh loos, Nia la fó buat ne'ebé sira husu. Oras ne'e, Nia hatán kedas ba Bartimeu nia harohan

HAREE: verbu ida ne'e, iha evanjellu Markos nian, la signifika de'it aspetu isin nian, maibé, liuliu iha kap. 16, bainhira Jezús moris hi'as ona, liafuan *haree* la'o nafatin ho liafuan *fiar*. Nune'e buat ne'ebé Bartimeu husu sai simbolu kona-ba *fiar* loos nian.

LA'O TUIR: buat hotu ne'ebé mosu ba Bartimeu, iha efeitu ida de'it: nia sai "eskolante", ema ne'ebé la'o tuir Jezús nia dalan. Bainhira Jezús foin mate, jentiu sira hanaran sarani sira "sira ne'ebé tuir dalan". Tuir Jezús nia dalan mak ema nia vokasaun.


MEDITATIO

Nu'udar animadór, pasajen ida ne'e sadik ita atu haree fila fali ita-nia hahalok nu'udar sarani no nu'udar animadór. Iha ne'e animadór ida bele hetan oinsá hadomi Jezús, tuir Nia no lori ema seluk atu tuir Nia. Personajen hotu ne'ebé mosu mak bele dehan buat ruma ba ita-nia esperiênsia nu'udar animadór. Pergunta ruma sei tulun ita atu reflète kona-ba ita-nia esperiênsia

- ? Ema barak tuir Jezús, la'o hamutuk ho Nia, maibé karik seidaok nakfilak ninia moris tuir Jezús nia hahalok: ha'u, nu'udar animadór, hatudu ba kolega sira katak ha'u halo ona hilin ida, ha'u hamriik ona hamutuk ho Jezús, maibé keta karik iha ha'u-nia moris iha parte ruma ne'ebé Jezús seidaok leno ho ninia roman no ha'u kontinua iha nakukun laran. Liuliu ha'u hatene fó atensaun, hanesan Jezús, ba sira ne'ebé folin la'ek ka ema seluk hakribit, ka, hanesan ema lubun boot, ha'u koko atu nonok tiha sira ne'ebé e prezisa atensaun no tulun?
- ? Iha ema ne'ebé matan delek tan isin, no iha ema ruma ne'ebé matan delek espirituál; bainhira ema ne'e lakohi hatene ninia salan, bainhira la *fiar* ba ema seluk-nia liafuan, bainhira halo an, ema sira ne'e mós sai matan delek. Nu'udar animadór ha'u mós bele sai matan delek: bainhira ha'u hatudu hahalok matan-delek nian.
- ? Bartimeu hatudu katak nia ulun to'os, nia kontinua hakilar no harohan ba Jezús maski ema si'ak nia. Ha'u hatene kontinua husu Maromak nia tulun, iha ha'u-nia atividade no iha ha'u-nia dezisaun, ka dala barak ha'u sente katak ha'u bele halo buat hotu mesak?
- ? Bainhira Jezús bolu Bartimeu, nia soe ninia kapa, ne'ebé ba ema kiak ida reprezenta buat hotu: ninia hatais, ninia manta bainhira malirin no toba kalan. Nia hamriik kedas no apresenta ninia an rasik "molik" no livre, hodi husik buat hotu ne'ebé nia iha no saran ninia an iha Jezús nia liman. Entre lian barak ne'ebé mosu iha ha'u-nia moris no sociedade ohin loron nian, ha'u hatene rekoñese Maromak nia lian ne'ebé ko'alia liuhusi orasaun, ema ne'ebé ha'u hasoru no labarik sira ne'ebé Nia entrega iha ha'u-nia liman? Iha ha'u-nia moris ha'u prontu atu husik buat ne'ebé folin la'ek, buat ne'ebé hadook ha'u husik Maromak no hamriik metin, nu'udar ema ne'ebé bele lori responsabilidade ida?
- ? Iha milagre ida ne'e, Jezús la hatudu hahalok oin seluk, Nia hatán kedas ba buat ne'ebé Bartimeu husu hodi dehan katak ninia *fiar* soi nia. Jezús rekoñese katak Bartimeu nia konstânsia no laran metin mak soi nia. Bainhira ha'u hakarak hasoru Jezús ho fuan tomak no maski difikuldade oinoin, iha ne'ebá hahú ha'u-nia santidade. Ha'u la bele fó ba labarik sira buat ne'ebé ha'u rasik laiha, ha'u la bele lori sira ba Jezús se ha'u seidaok hamriik atu ba hasoru Nia.
- ? Oinsá nu'udar grupo animadór ita tulun malu atu hagle'an ita-nia *fiar*, atu sai ema livre iha Maromak-Nia dalan? Liuhusi atividade sa de'it? Ha'u fó kontribusaun ida ne'ebé atu grupo bele moris tuir Jesus-Nia ain-fatin iha moris loroloron nian?
- ? Nu'udar animadór, ha'u hatene haree "milagre" sira ne'ebé Maromak halo iha ita ida-idak, iha labarik sira ne'ebé ha'u hasoru, iha ha'u-nia familia laran?

ORATIO

Ha'u halo ha'u-nia harohan ba Na'i, hodi husu ba Nia matan moos atu bele hatene Ninia prezensa iha ema leet, no konstânsia atu ba oin nafatin, maski difikuldade oinoin bele mosu iha ha'u-nia serbisu iha oratóriu.



ACTIO

Reflète tiha kona-ba pasajen ida ne'e, ha'u bele halo saida iha ha'u-nia moris loron-loron nian no durante ha'u-nia prezensa iha oratóriu?